



Uunga siunnersuutit:

Inatsisartut aaliangiiffigisassaattut siunnersuut Naalakkersuisut peqquneqassasut Naalagaaffimmi oqartussaasunut saaffigineqqullugit qulakkeerniarlugu, Kalaallit Nunaata killilersorneqanngitsumik Istanbulimi isumaqatigiisummut ilanngunnissaa. Tamanna pissaaq UPA2022 pisinnagu. (Inatsiartunut ilaasortaq Anna Wangenheim, Demokraatit)

Inatsisartut aaliangiiffigisassaattut siunnersuut Naalakkersuisut peqquneqassasut aningaasanik immikkoortitsinissaannik persuttaanerup minnerunngitsumillu angerlarsimaffimmi persuttaanerup akiorniarnissaa ersarissumik anguniarlugu, inuiaqatigiinni 2025-mi persuttaanerit amerlassusaat ullumikkumut sanilliullugit 25 procentimik apparsimassasut. Paasisitsiniaaneq kingusinnerpaamik 1. august 2022 aallartinneqassaaq 31. december 2024-ip tungaanut ingerlanneqassalluni. (Inatsisartunut ilaasortaq Anna Wangenheim, Demokraatit)

Siullermeernerat

Siunnersuutigineqartoq Europarådit isumaqatigiissutaa arnat persuttarneqartarnerisa angerlarsimaffimmilu persuttaasernerup pinaveersaartinnessaanik, Istanbulimi isumaqatigiissutitut ilisimaneqarnerusumut tunngavilersuutaanullu paasinnilluaqaluta aammalu aningaasanik immikkoortitsinissaannik persuttaanerup minnerunngitsumillu angerlarsimaffimmi persuttaanerup akiorniarnissaa ersarissumik anguniarlugu, inuiaqatigiinni 2025-mi persuttaanerit amerlassusaat ullumikkumut sanilliullugit 25 procentimik apparsimassasut siunnersuutitut qujalluta imatut oqaaseqarfigissavagut.

Nunatsinni qanigisariinni nakuusernerup akiorneqarnissaa pillugu Naalakkersuisut suliaqaleruttornerat aammalu nakuusernermik eqqugaasut nakuusertullu eqqortumik piffissarlu eqqorlugu ikiorneqartarnissaat oqariartuuteqarnerat siunissamilu inuiaqatigiinni nakuusernerup annertussusaata annikillisinneqarneranik suliniuteqarnerat iluarisimaarparput.



Iliusissatut pilersaarutit Naalackersuisut suliaqaleruttornerat Meeqqanut, Inuusuttunut Ilaqutariinnullu Naalackersuisoqarfimmi tutsuviginartutut isigivarput aammalu misilittakkat soorlu ”Killiliisa 2018-mi pitsaasumik misilittakkat atorneqarsinnaanerata aammalu inoqatinut attaveqaatit atorlugit suliniarnerit misillittagaqarfigineqarnerat iluatinnartutut isigaarput.

Persuttaasarneq akiussagutsigu nunap inui tamatta pineqarpugut, tassani ikioqatigiinnissaq annertoq pisariaqarpoq, nipangersimaannarata ajornartorsiullu ammasumik eqqartorniartigu. Nunap inui tamatta akisussaaqataasariqarpugut persuttaasarneq unitsinneqassappat, persuttaaneq meeqqat akornanniikkaluarpata, inuusuttut akornanniikkaluarpata, inersimasut akornanniikkaluarpata, utoqqaat akornanniikkaluarpata, inersimasumiit meeqqamut il.il. Eqqaamaneqassaaq persuttaaneq timikkut kisimi pineq ajormat, aammattaaq oqaatsitigut iliuutsitigullu persortaaneq annertoq annernarluinnartorlu pisarmat. Kalaallit Nunanni sumiikkaluaruttalunniit tamatta ikioqatigiilluta annikilliarortitseqataasinnanerpata takutitsigu. Sapinngilagut, nalunaarutiginnitta nipangersimaannarata, tamaaliornikkut ajunngitsuliorpugut inoqammut ikiuigatta.

Persuttaaneq qanoq ittuugaluarpata taakkununga sapinngisami tamatta isigut siutigullu ammatiinnavittariaqarpagut, paasisaqarutta pasitsaassaqaruttalunniit ingerlaannavik nalunaarutiginnitta, sapinngilagut, Imaluunniit illit nammineq persutagaaguit assigisaaniluunniit misigititaaguit, inuunerni ingerlaqqigit tassanngaannit anigit susassaqtunut nalunaarit, sapinngilatit, takutiguk sapernak. Imaluunniit illit persuttaasooq persuttaasartoq iliuuseqataaniarit takutiguk ajortuinnaanginnerit, takutiguk inuuneq taanna qimassinnaagit sapinngikkat, imminut isumakkeerfigigit aamma isumakkeerfiginnigit tassa tamakku suliasatit siulliit persuttaasartutut inuuneqarunnaassaguit. Eqqaamallugu asaneqaravit tassa taanna aqutissaraat aniguinissamik. Asanninneq.

Inuiaqatikka takutitsigu saperata, takutitsigu Kalaallit Nunarput persuttaaffiunngittoq. Tassa massakut iliuuseqarneq aallartitsigu uku minutsit ingerlasut aap tassa massakut, ikioqatigiinneq aallartitsigu, illit inoqat tusarnaartoq takutiguk persuttaaneq naaggaarluinnarit, tassa taamaaliornikkut persuttaaneq massakut annikillisarsinnaavoq suliniutit pilersaarutillu utaqqeqqaanngikkaluarlugit, kinaagaluaruillunniit akisussaaqataavutit inoqatit



inuunerlutaatinneqarpat, pisussaatitaavutit inuunermi taama ittumit anissappat iliuuseqarnissami, tassa taanna pisinnaatitaaffigivat unioqutitsinerunngilaq, taamaalioruit ajunngittuliorputit. Persuttaaneq unitsilli persuttaaneq naaggaarparput tassa massakku aallartippunga aallarteqatigisinga. Persuttaaneq naaggaarpara.

Siunnersuuteqartoq aamma Naalackersuisut allannguutissatut siunnersuutaat ilanngullugit matumuuna taperserparpagut, taamaasillugulu ataatsimiititaliamut susassaqartumut suliarineqarnissaat innersuussuutigalugit.